

## ILUARSIISSUT

### Isumaliutissiissut 2. November 2019 ullulerneqartoq taarserpaa

(Imm. 54 pillugu Atassummit aammalu Naalakkersuisunit allannguutissatut siunnersuutitut saqqummiunneqartut isumaliutissiissummi siusinnerusukkut agguaanneqartumi kukkunikkut isummerfigineqanngitsoorput. Tamanna iluarsiiissummi matumani ilanngunneqarpoq, soorluttaa imm. 54-imut ataatsimiititaliap inassutai iluarsineqartut)

**Uunga siunnersuut: Eqqusuinermi akitsuutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq. (Plug-in hybridbiilit akitsuutaat, biilinit innaallagissamik imaluunniit brintimik ingerlatilinnut akitsuummik akiliisussaanningneq kiisalu qamutit motorillit nunaannakoorutit minnerusut akitsuutaannik atorunnaarsitsineq),**

*Partii Naleqqamit saqqummiunneqartoq,*

**Uunga siunnersuut: Qamutit motorillit akileraarutaat pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2019-imeersoq.**

**(Qamutitut motorilinnut taamaallaat innaallagissamik brintimilluunniit ingerlatilinnut plug-in hybridbiilinnut akitsuut, qamutitut motorilinnut nunakoorutitut mikinerlut akitsuuteqartitsinnginneq kiisalu akiliinissamut piffissaliussamik allannguneq)**

*Partii Naleqqamit saqqummiunneqartoq,*

**Qamutit motorillit akileraarutaat pillugit Inatsisartut inatsisaata allanngortinnissaa, imaalillugu ATV-it taakkunungalugu assingusut qamutit motorillit nunakoorutit mikinerit sisamanik amerlanerilluunniit assakaasullit ukiumut akileraarutaat 2.000 kronemut appartinnissaanik Naalakkersuisut peqquneqarnissaannik Inatsisartut aalajangiiffisassaattut siunnersuut**

*Stine Egedemit, Inuit Ataqtigiit, saqqummiunneqartoq*

**Ulloq 1. juuli 2020 aallarnerfigalugu ATV-nut qamuterallannullu akitsuutit peqqullugit Naalakkersuisut peqquneqarnissaannik Inatsisartut aalajangiiffisassaattut siunnersuut**

*Justus Hansenimit, Demokraatit, saqqummiunneqartoq*

**pillugit**

**Aningaasaqarnermut Akileraartarnermullu Ataatsimiititaliap**

## **siunnersuutit aappassaaneerreqarnerannut**

### **ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq  
Inatsisartunut ilaasortaq Peter Olsen, Inuit Ataqatigiit, siulittaasup tullia  
Inatsisartunut ilaasortaq Karl-Kristian Kruse, Siumut  
Inatsisartunut ilaasortaq Henrik Fleischer, Siumut  
Inatsisartunut ilaasortaq Múte Bourup Egede, Inuit Ataqatigiit  
Inatsisartunut ilaasortaq Malene V. Rasmussen, Demokraatit  
Inatsisartunut ilaasortaq Jens NapátôK', Partii Naleraq

2019-imi ulloq 25. september kiisalu 4. maj (UKA 2019/54) siullermeerinninnerup kingorna ataatsimiititaliap siunnersuutit misissorpai.

#### **Siunnersuutit imarisaat siunertaallu**

**UKA 2019/165:** Inatsisissatut siunnersuutikkut siunertarinearpoq plug-in hybridbiilit akitsuutininik akiliisussaanninnerisa 2025-ip tungaanut atorunnaarsikkiartuaarneqarnissaa, biilit innaallagissamik brintimillu ingerlatillit kiisalu ATV-t snescooterillu eqqussuinnermut akitsuummik akiliisussaajunnaarnissaat kiisalu akitsuuseriaatsip allanngortinneqarnissaa, taamaalillunilu biilit mikinerit (75.000 kr.-it ataallugit fakturami nalillit) 50.000 kr.-inik akitsuuserneqassallutik aammalu biilit 75.000 kr.-it sinnerlugit fakturami nalillit fakturap nalingata 125 %-ianik akitsuuserneqassallutik.

**UKA 2019/166:** Inatsisissatut siunnersuutikkut siunertarinearpoq plug-in hybridbiilit qamutininut motoorilinnut akileraaruteqaleriartortinneqassasut, taamaaliornikkullu biilit taamaattut motorimut akileraarutaat ukiut tallimat ingerlaneranni 2020-mi 50 %-imiit 2025-imi 100 %-imut nalinginnaasunngoriartuaartinneqassalluni. Biilininut akuerisaasunut oqimaassutsit atuuttut assingi siunnersuummi atorneqarput. Biilit inaallagissamik brintimillu ingerlatillit motorimut akileraarutaat 2020-mit 50 %-imut aalajangiunneqassaaq. Tamatumani aamma biilininut akuerisaasunut oqimaassutsit atuuttut assingi siunnersuummi atorneqarput. Kiisalu ATV-t, snescooterit assigisaallu qamutit motoorilillit akileraaruteqaataasussat nalunaarsorsimaffiannut siunnersuutikkut ilanngunneqassapput.

Akileraarulli 0 kr.-imut inissinneqassalluni. Naggasiullugulu siunnersuutigineqarpoq akiliinissamut piffissarititap qaammammi ulloq kingullermut aalajangiunneqarnissaa.

**UKA 2019/135:** ATV-t assigisaasalu motoorimut akileraarutaasa ukiumut 2.000 kr.-inut appartinneqarnissaa aalajangiiffigisassatut siunnersuutikkut siunertarineqarpoq.

**UKA 2019/54:** ATV-t snescooterillu eqqussuinermut akitsuummik akiliuteqartarunnaarnissaat aalajangiiffigisassatut siunnersuutikkut siunertarineqarpoq.

### **Siunnersuutit Inatsisartunit siullermeerneqarnerat**

Inatsisissatut siunnersuutit imm. 165 aamma 166 siullermeerinninnermi ilaannit tapersersorneqarpoq ilaannillu tapersersorneqarani. Qamutit motorillit oqimaassusiat tunngavigalugu akileraaruseeriaaseq naapertuunnerpaajunngitsoq Naalakkersuisut oqaatigaat. Qamutit motorillit avatangiisinut innarliinerat aallaavigalugu akileraaruseeriaasissaq Naalakkersuisunit sulissutigineqartoq aamma paasissutissiissutigineqarpoq. Inatsisissatut siunnersuutit saqqummiunneqartut tusarniaassutigineqartariaqartut Naalakkersuisut ilanngullugu oqaatigaat. Plug-in hybridbiilit akileraarutaasa nalinginnaasunngortikkiartuaarnissaat aammalu ATV-t snescooterillu akileraarutitigut oqilisaassiffigineqarnissaat Siumumit tunngaviusumik taperserneqarpoq. Plug-in hybridbiilit akileraaruserneqarnissaat taamatullu ATV-t assigisaasalu akileraaruserneqannginnissaat Inuit Ataqtigiinnit taperserneqanngilaq. Akerlianik ATV-t motorimut akileraarutaata appartinneqarnissaa partiip taperserpaa, tak. imm. 135. Taamatuttaaq plug-in hybridbiilit akileraaruserneqarnissaat Demokraatinit taperserneqanngilaq, imm. 135-p itigartinneqarnissaa inassutigineqarluni aammalu imm. 54 naapertorlugu ATV-t akileraaruserneqannginnissaat taperserneqarluni. Siunnersuutit ilaat biilit innaallagiartortut aamma plug-in hybridbiilit akileraaruserneqarnissaannut tunngasut Atassutip eqqarsarnartoqartippaa, siunnersuutilli ilaat ATV-t il.il. qamutit motorillit akileraarutaasat aammalu eqqussuiner

### **Tusarniaanermut akissutit**

Aalajangiiffigisassatut siunnersuutit imm. 54 aamma 135 tusarniaassutigineqassanngillat. Aalajangiiffigisassatut siunnersuut akuerineqarpat aalajangiiffigisassatut siunnersuutip

nassatarisaatut inatsisiliassanik ilusilersuinnermut atatillugu tusarniaasoqassanersoq Naalakkersuisut namminneq aalajangissavaat.

Inatsisissatut siunnersuutit imm. 165 aamma 166 tusarniaassutigineqarsimanngillat. Imm. 165-imut pillugu siunnersuuteqartoq ima paasissutissiivoq:

*”Siunnersuut UKA2018-imi Naalakkersuisunit saqqummiunneqartoq pingaaruteqarnera peqqutigalugu siunnersuut saqqummiuteqqinneqartoq, kingusinnerusukkulli naalakkersuinikkut suliaqarnermik peqquteqartumik utertinneqarluni. 2018-imi siunnersuutigineqartumit siunnersuutigineqartup uuma taamaallaat allaassutigaa Inatsisartut inatsisaata atuutilersinneqarneratigut plug-in hybridbiilit tamakkiisumik eqqussuinnermi akitsuuserneqartussaanninnerat, eqqussuinnermili akitsuuteqartitsinnginneq maanna atuuttoq ukiuni tallimani atorunnaarsikkiartuaarneqartussaalluni. Tamanna tunngavigalugu siunnersuutip aammaarlugu tusarniaassutigineqarnissaa pisariaqartinneqarsimanngilaq. Akerlianillu tusarniaanerup ingerlanneqarsimaneranut nalunaarusiaq tusarniaanermilu akissutigineqartut UKA 2018/198 tusarniaanermi akissutit tigineqartut inatsisillu nassuiaatitaannik misissuinerit taakkunungalu ilanngussat innersuussutigineqassapput.”*

Imm. 166-imut pillugu siunnersuuteqartoq ima paasissutissiivoq:

*”Siunnersuut annertunerpaatigut tassaavoq siunnersuummik Naalakkersuisunit UKA 2018-imi saqqummiunneqartumik, naalakkersuinikkulli pissutsit pissutigalugit tunuartinneqartumik, saqqummiusseqqinneq. Siunnersuut una imarisamigut 2018-imi siunnersuutigineqartumut sanilliulluni taamaallaat makkunatigut allaassuteqarpoq:*

- *Qamutitut motorilinnut innaallagissamik brintimilluunniit ingerlatilinnut akileraarut akileraarutip tamarmiusup taamaallaat 50 %-eraa.*
- *Plug-in hybridbiilit akileraarutaat akileraarutip tamarmiusup taamaallaat 50 %-eraa, taamaattorli 2025 tikillugu ukiumut 10 procentpointimik qaffakkiartuaassalluni, taamaalineranilu akileraarummik tamakkiisumik akiliisoqartalissalluni.*
- *Siunnersuut igitassanngortitsinnermi akiliuteqartitsinissaq pillugu aalajangersakkanik imaqanngilaq.*

*Tamanna tunngavigalugu siunnersuutip aammaarluni tusarniaatigeqqinnissaa pisariaqartutut isigineqanngilaq. Taarsiulluguli UKA 2018/197-imi inatsimmuut nassuiaatinitassungalu ilanngussani tusarniaaneq pillugu nassuiaat aammalu tusarniaanermut akissutit innersuussutigineqarput.”*

Aningaasaqarnermut Akileraartarnermullu Ataatsimiititaliaq tunngaviusumik isumaqarpoq inatsisissatut siunnersuutit innuttaasunik inuussutissarsiortunillu kalluaasut pingaarnertut malittarisassaralugu tusarniaassutigineqartuaannartariaqartut. Siunnersuutit tusarniaassutigineqannginnissaannut siunnersuuteqartup tunngavilersuutaa ataatsimiititaliamit ilaatigut paasineqarsinnaavoq, nalinginnaasumilli kaammattuutigineqassalluni inatsisissatut siunnersuutit siunnersuutinut siusinnerusukkut saqqummiunneqartunut assingugaluarlutik tusarniutigineqartassasut.

### **Saaffiginnissutit**

Biilnik eqqussuisunit arlalinnit saaffiginnissummik ataatsimiititaliaq tigusaqarpoq. Saaffiginnissut ilanngussaq 1-itut ilanngunneqarpoq.

Sulisitsisut - Sullissinermut Assartuussinermullu Sulialinnut Ataatsimiititaliaq – Aningaasaqarnermut Akileraartarnermullu Ataatsimiititaliamut sassartitsivoq. Sulialinnut Ataatsimiititaliap oqaasiisa allattorsimaffiat ilanngussaq 2-tut ilanngunneqarpoq.

### **Ataatsimiititaliap siunnersuutinik suliarinninnera**

#### Plug-in hybridbiilit aamma biilit innaallagiartortut

Konto pingaarnermut 24.11.10-mut aamma 24.11.11-mut oqaasertaliussat naapertorlugit biilit innaallagiartortut, biilit brintimik ingerlatillit aammalu plug-in hybridbiilit akileraaruteqanngikkallarnerat 1. januar 2020-mi atorunnaassaaq. Allatut aalajangiisoqanngippat tamatuma kingorna biilit biilitut allatut nalinginnaasutut isigineqalissapput, taamaalillutillu aamma annertussutsit oqimaassutsillu biilinit nalinginnaasunut atuuttut assingannik akileraarusersorneqalissallutik.

Akileraarusiinnginneq atuukkallartuinnartut isigineqartuarsimavoq – tassaallunilu biilit ineriartortinneqarneranni siusissukkut biilnik avatangiisinik mingutsitsinnginnerusunik atuisoqarnerulernissaanut kajumissaatitut, taamaalillunilu nunatsinni CO2-mik aniatitap ataatsimoortup annikinnerulersinneqarnissaanut iliuuserineqartoq. Tassunga atatillugu biilit nunatsinni niuerfinni atugaaleriartornerat ilutigalugu akileraarutit nalinginnaasunngortikkiartuaarneqartussaallutik. Taamaalillunilu biilinit benzinatorlutillu dieselitortunit biilinit inaallagissamik/brintimik ingerlateqartunut nuukkiartuaarnissap ungasinnerusoq isigalugu nunatta karsianut iluanaarutaananilu annaasaqaataannginnissaa, nuukkiartuaarnerli aallartisarumallugu biilinit nutaalianut akileraarutit piffissami ikaarsaariarfusumi oqilisaaffigineqarsinnaanissaat anguniaasimavoq.

Naalakkersuisut inatsisissatut siunnersuutaasa (UKA 2018/197 aamma 198)

suliarineqarnerannut atatillugu siunnersuutit ilaat plug-in-hybridbiilit eqqussuinnermut akitsuummik aammalu motorinut akileraarummik akiliisinneqarnissaannut tunngasut kiisalu biilit innaallagiartortut motorimut akileraaruserneqarnissaat tapersersinnaanagu ataatsimiititaliap oqaatigaa. Tassunga atatillugu akitsuuseeriaatsip nalinginnaasumik allanngortinneqarnissaanik sulineq tamatumunnga taarsiullugu Naalakkersuisut aallartissagaat ataatsimiititaliamit kaammattuutigineqarpoq, taamaalilluni tamatumani fakturami naliusog oqimaassusiallu kisiisa pinnagit biilit avatangiisinut innarliinerat aallaavigineqarneroqqullugu.

Tamanna pillugu ataatsimiititaliap isummenera Naalakkersuisunit maanna isumaqatigineqartoq ataatsimiititaliap iluarisimaarlugu maluginiarpaa. Taamaalillutillu Naalakkersuisut akissuteqqamminni ima allapput:

*”Qamutininut motorilinnut akitsuutit allanngortinneqarnerat pillugu inatsisissatut siunnersuut qamutit motorillit oqimaassusaannik aallaaveqarpoq. Tamanna qamutininut motorilinnut innaallagissamik ingerlateqartunut kiisalu plug-in-hybridbiilinnut aamma atuuppoq. Naalakkersuisulli qamutit motorillit innaallagissamik ingerlateqartut kiisalu plug-in hybridbiilit batteriiningerlateqartut orsussanik atuisunut sanilliullutik oqimaannerunerisa nassatarisaanik aaqiinerup taassuma naapertuuttuunera qularaat. Kalaallit Nunaanni qamutit motorillit innaallagissamik ingerlateqartut plug-in hybridbiilillu nalinginnaanerpaat misissornerisa, taakku qamutininut motorilinnut orsussamik imerpalasumik ingerlateqartunut sanilliullutik agguaqatigiissillugu 15-20 procentimik oqimaannerusarnerat takutippaa. Oqimaassutsit nikinganerat qamutini motorilinni oqinnerusuni, oqimaannerusunut sanilliullugu annertuneruvoq. Qamutilluunniit motorillit innaallagissamik ingerlateqartut akitsuutaat 50 procentimik apparneqaralarpat, qamutip motorillit innaallagissamik ingerlateqartup oqitsup akitsuutaa qamutitulli motorilittut orsussamik imerpalasumik ingerlatilittulli annertutigissaaq. Allatut oqaatigalugu oqimaassutsimik aallaaveqartumik akitsuusersueriaaseq qamutininut motorilinnut avatangiisinut qajassuarnerusunut ikaarsaarnermut iluaqutsiinngissaanut aarlerinaateqarpoq”*

Naalakkersuisut nangillutik allapput:

*”Taamaammat siunissami qamutininut motorilinnut akitsuutit orsussamik imerpalasumik atuinermik toqqammaveqarnissaannik nassataqartumik siunnersuummik Naalakkersuisut suliaqarput”*

Siuliani allassimasog naapertorlugu tamanna ataatsimiititaliap UKA 2018-imi kaammattuutaanut naapertuuppoq. Tamatumunnga nangissutitut ataatsimiititaliamit Naalakkersuisunut kaammattuutigineqassaaq akitsuusersueriaatsip allanngortinneqarnissaanik

sulineq annertusaqqullugu.

#### Eqqussinermut akitsuutip allanngortinneqarnissaa

Inuit biiliinik eqqussuinermit akitsuutip allanngortinneqarnissaanik siunnersuut ataatsimiititaliamit suli **taparserneqarsinnaanngilaq**, tassuunakkummi biiliaqqat siunnersuutikkut akikinnerulersinniarneqartut ataatsimut isigalugu nunatsinni aqqusinernut silaannarmullu naleqqutinnginnerat eqqumaffiginiarneqanngimmat. Tamatuma peqatigisaanik biilit anginerit naleqqunnerusulli siunnersuutikkut akisunerulersinneqassapput.

#### Snescooterit aamma ATV-t

Snescooterit qamutillu motorillit nunakkoortit mikinerit (ATV, UVT aamma sisamanik assakaasullit) siunnersuut matumani pineqartoq malillugu eqqussuinermit akitsuuteqartinneqassanngitsut, tamatumalu peqatigisaanik biilinit motorimut akileraarummik akiliuteqartussanut nalunaarsuiffimmut ilanngunneqassasut ataatsimiititaliamit maluginiarneqarpoq<sup>1</sup>. Akileraarulli 0,00 kronimut aalajangersarneqassaaq.

Tamatumunnga tunngavilersuutitut innersuussutigineqarpoq snescooterit qamutillu motorillit mikinerit nunakkoortit amerlasuutigut illoqarfinni mikinerni nunaqarfinnilu naleqqunnerusutut atoruminarnerusutullu isigineqartarmata, tamatumalu peqatigisaanik biilinit mikinernit nalanginnaasunit mingutsitsinnginnerusutut nalilerneqartarmata. Tamatumunnga atatillugu ataatsimiititaliamit eqqumaffigineqarpoq akileraaruteqartitsinnginnissaq aalisarnermik piniarnermillu inuussutissarsiuqartunut iluaqutaasussat naatsorsuutigineqarmat, tamannalu ataatsimiititaliamit maannangaaq tapersersornartinneqarsinnaalluni.

Snescooterit ATV-llu akileraaruteqartinneqanngikkallarnernanni ukiumoortumik iluanaarutinit annaasassat 6.500.000 kr.-it missaanniittussat UKA 2018/198-imut atatillugu Naalakkersuisuit naatsorsorneqarput. Inatsisissat siunnersuutitut maanna saqqummiunneqartuni (imm. 165 aamma 166) plug-inhybridbiilini aamma biilini innaallagiartortunik akileraarusiinissamik siunnersuut snescooterit il.il. akileraaruserneqannginnissaannut siunnersuuteqartup atatippaa, taamaaliornikkut akileraaruteqartussannginneq akitsuuteqartitsinermik nalimmassarneqarluni. Taamaalillunilu snescooterit ATV-llu akileraaruteqartinneqannginnissaat kisimi akuerineqassappat ukiumoortumik 6.500.000 kr.-it aningaasanut inatsimmi nassaarinierneqartariaqassapput. Tamanna aamma atuuppoq imm. 54 akuerineqassagaluarpat.

---

<sup>1</sup> Snescooterit maanna eqqussuinermit akileraaruteqaataasarpup motorinullu akileraaruteqaataasarnatik.

### **Siunnersuutit aningaasaqarnikkut kingunerisassa**

Siunnersuutit aningaasaqarnikkut kingunerisassa siunnersuutini pineqartuni sisamani tamani tamakkiisumik nassuiarneqarsimasut ataatsimiititaliamit maluginiarneqarpoq, naak imm. 54 aamma 135-imut tunngatillugu nassatarisaasumik aningaasartuutissat ukiumut 6.500.000 kr-it aamma 1.500.000 kr.-it missaanniittut aningaasalersuutissaannik siunnersuummik saqqummiussisoqanngikkaluartoq.

### Siullermeerinninnermi imm. 54 pillugu allannguutissat siunnersuutit Atassummit aammalu Naalackersuisunit saqqummiunneqartut

Atassut allannguutissat siunnersuummik imaattumik saqqummiussivoq:

*“Ulloq 1. Juuli 2020 aallarnerfigalugu ATV-nut qamuterallannullu sullisinut akitsuutit peeqqullugit, qamuterallannullu minnernut sulinermut atornerneqajortunut akitsuutip qaffaanissaa pillugu Naalackersuisut misissueqqullugit peqquneqarnissaannik Inatsisartut aalajangiiffigisassaattut siunnersuut”.*

Ataatsimiititaliap isumaa malillugu siunnersuutigineqartut assigiinngisitaartumik aaqqissuussineq taamaattoq allaffissornikkut unammilligassanik arlalinnik nassataqassaaq, taamaalillunilu aamma aningaasartuutaassalluni. Iluarsaaqqinnissaminnili qamutit motorillit assigiinngitsut tamaasa ilannguteqqullugit Naalackersuisut ataatsimiititaliamit kaammattorneqarput, taamaattumillu siunissami akitsuuseeriaasissani qamutit motorillit inuussutissarsiorluni aammalu sunngiffimmi atornerqartut imaassinnaavoq immikkoortinneqartut.

Tamanna tunngavigalugu allannguutissat siunnersuut itigartinneqassasoq ataatsimiititaliap isumaqatigiittup inassutigaa.

Naalackersuisut allannguutissat siunnersuummik imaattumik saqqummiussipput:

*”Qamutitut motorilinnut akitsuutit ataatsimut allanngortinneqarnerannut atatillugu isertitanikiluaanarutitut sunniteqanngitsumik atorunnaarsinneqarsinnaassappata qamutitut motorilinnut akitsuutit allanngortinneqarnissaannut atatillugu ATV-nik qamuterallannullu eqqussinermi akitsuutit atorunnaarsinneqarnissaannut periarfissaq naliliiffigeqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut”*

Ataatsimiititaliap paasinninnera malillugu snescooterinik ATV-nillu eqquuinermut akitsuutit atorunnaarsinneqarnissaat naalackersuinikkut tapersorsorneqarluarpoq. Akitsuutip



atorunnaarsinneqarnera iluanaarutissanik annaasaqaataangilluinnarnissaa Naalakkersuisut allannguutissatut siunnersuutaatigut tunngavissaatinneqarmat allannguutissatut siunnersuut ataatsimiititaliamit taparserneqarsinnaanngilaq.

Tamanna tunngavigalugu allannguutissatut siunnersuut itigartinneqassasoq ataatsimiititaliap isumaqatigiittup inassutigaa.

### **Ataatsimiititaliap inassuteqaatai**

Ataatsimiititaliami amerlanerussuteqartut Siumumeersut aamma Partii Naleqqameersut isumaqarput, qamutit motorillit avatangiisinut sunniutaannik tunngaveqartumik, akitsuuseeriaatsimik nutaamik Naalakkersuisut saqqummiussinissaasa tungaannut snescooterinik ATV-nillu eqquusuinermi akitsuutip peerneqarnissaanut (imm. 54 naapertorlugu) aammalu ATV-t qamutitut motorilinnut akileraarutaasa appartinnissaannut (imm. 135 naapertorlugu) aningaasaqarnikkut periarfissiinissaq siunertaralugu plug-inhybridbiilit qamutitut motorilinnut ilaannakortumik akileraaruserneqarnissaannik atuutilersitsinissaq naapertuuttusoq. Tamanna ilaatigut nunatta karsiata iluanaarutissatigut annaasaqannginnissaata anguniarneqarnissaa eqqarsaatigalugu pisariaqartutut ilaatigullu plug-inhybridbiilit ima amerlatigilersimammata taakkuninnga piginnittut qamutit motorillit akileraarutaannik akiliinikkut nunatta karsianut tapeeqataasariaqarnerat naapertuuttutut ataatsimiititaliami amerlanerussuteqartunit isigineqarpoq. Tassunga atatillugu qamutit motorillit taakku qamutit motorillit akileraarutaannut appasinnerpaamut aallarniutigalugu inissinneqarnissaat ataatsimiititaliami amerlanerussuteqartunit naammaginartutut isigineqarpoq, taamaaliornikkut plug-inhybridbiilit taamaattut atornissaat aningaasaqarnikkut isigalugu suli pilerinartooqqullugu. Akerlinilli biilit plug-init aammalu innaallagiartortut eqquusuinermit akitsuuserneqarnissaat ataatsimiititaliami amerlanerussuteqartunit maanna kissaatigineqanngilaq. Tamanna biilinut akitsuusersuinermit Naalakkersuisut iluarsaaqqinnissaannut utaqqinneqartariaqarpoq.

Snescooterinik ATV-nillu eqquusuinermi akitsuutip peerneqarnerata kiisalu ATV-t qamutitut motorilinnut akileraarutaasa appartinnerata nassatarisaannik iluanaarutissaagaluanit annaasat plug-inhybridbiilit qamutitut motorilinnut ilaannakortumik akileraaruserneqarnissaannik atuutilersitsinikkut matussuserneqarsinnaanngitsut ataatsimiititaliami amerlanerussuteqartunit ilisimaneqarpoq. Akitsuuseeriaasissamik nutaamik Naalakkersuisut saqqummiussinissaasa tungaanut iluanaarutissaagaluanit annaasaagallartut ukiumut katillugit 2,6 mio. kr.-it missaanniissapput. Taamaattumillu siunissami akitsuuseeriaasissamik sulineq annertusaqqullugu Naalakkersuisut ataatsimiititaliami amerlanerussuteqartunit kaammattorneqarput.

Ataatsimiititaliami amerlanerussuteqartut imm. 166-imut allannguutissatut siunnersuummik siuliani allassimasunut naapertuuttumik siunnersuutit pingajussaaneernejarnissaannut saqqummiussissapput.

Imm. 165 itigartinneqassasoq ataatsimiititaliami amerlanerussuteqartut inassutigaat, tassa biilnik eqqussuineranut akitsuutinik allannguinnissaq Naalakkersuisut biilnut akitsuutinik qanittumi iluarsaaqqinnissaannut utaqqinneqartariaqartoq amerlanerussuteqartut isumaqarmata.

Ataatsimiititaliami amerlanerussuteqartut isumaat malillugu snescooterinik ATV-nillu eqqussuineranut akitsuummik appaaqqinnissaq atorunnaarsitsinissarlunniit akitsuuseeriaasissamik Naalakkersuisut suliaqarneranni ilanngunneqarsinnaavoq.

Plug-inhybridbiilit biilillu inaallagiartortut (motoorimut akileraarummik eqqussuinernullunniit akitsuummik) akitsuusernejarnissaat, biilnik oqimaassusiannik aallaaveqanngitsumik avatangiisinulli innarliinerannik aallaaveqartumik akitsuusersueriaaseqalernissamik siunertaqartumik, Naalakkersuisut iluarsaaqqinnissamik suliaqarnissaannut utaqqinneqartariaqartoq ataatsimiititaliami ikinnerussuteqartut Inuit Ataqaatigiinneersut Demokraatineersullu suli isumaqarput. Akitsuuseeriaaseq taamaattoq ukiut 1-2 qaangiuppata saqqummiunneqarnissaminut piareersinnaassasoq Naalakkersuisunit oqaatigineqartoq ataatsimiititaliami ikinnerussuteqartunit maluginiarneqarpoq, tamannalu suliaqartut ilaannit oqariartuutigineqartunut naapertuuppoq, taakkumi kissaatigimmassuk qamutit motorillit pineqartut akitsuusersugaanngikkallarnerisa sivitsorneqarnissaa. Akitsuuseeriaasissap nutaap piareernissaanut piffissaq innaallagissamik immiivinnik pilersitsiortorluni pisariaqartumik annertusaanermut atorneqassasoq ataatsimiititaliami ikinnerussuteqartut kaammattuutigaat.

Snescooterit ATV-llu eqqussuineranut akitsuuteqartinneqannginnissaat (imm. 54) aammalu ATV-t motorinut akileraarutaasa appartinneqarnissaa (imm. 135) ataatsimiititaliami ikinnerussuteqartunit tapernerneqarput. Tamanna akitsuuseeriaasissamik nutaamik, snescooterit ATV-llu akitsuutaasa minnerpaaffimminniitinneqarnissaannik naalakkersuinikkut amerlasuunit kissaatigineqartumut matussusiisariaqartumik, Naalakkersuisut saqqummiussinissaasa tungaannut nunatta karsiata 8 mio. kr.-it tikillugit iluanaarutissaagaluanik annaasaqaataagallassasoq ataatsimiititaliami ikinnerussuteqartut ilisimavaat. Taamaattumillu siunissami akitsuuseeriaasissamik sulineq annertusaqqullugu Naalakkersuisut ataatsimiititaliami ikinnerussuteqartunit kaammattorneqarput.

**UKA 2019/165:**

Siunnersuut itigartinneqassasoq ataatsimiititaliap isumaqatigiittup inassutigaa.

**UKA 2019/166:**

Siunnersuut ataatsimiititaliami amerlanerussuteqartut allannguutissatut siunnersuutaattut iluseqartoq akuerineqassasoq ataatsimiititaliami amerlanerussuteqartut Siumumeersut Partii Naleqqameersullu inassutigaat.

Siunnersuut itigartinneqassasoq ataatsimiititaliami ikinnerussuteqartut Inuit Ataqaatigiinneersut Demokraatineersullu inassutigaat.

**UKA 2019/135:**

Siunnersuut akuerineqassasoq ataatsimiititaliamit isumaqatigiittumit inassutigineqarpoq.

**UKA 2019/54:**

Allannguutissatut siunnersuutit Atassummit aamma Naalakkersuisunit saqqummiunneqartut itigartinneqassasut siunnersuutaaqqaartorlu akuerineqassasoq ataatsimiititaliamit isumaqatigiittumit inassutigineqarpoq.

4. november 2019


UKA 2019/165

UKA 2019/166

UKA 2019/135

UKA 2019/54

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuutit aappassaaniigassanngortippai.



Hermann Berthelsen  
Siulittaasoq



Peter Olsen  
Siulittaasup tullia


Karl-Kristian Kruse



Henrik Fleischer



Múte Bourup Egede



Jens Napaattoq



Malene V. Rasmussen